


DEPORTE

DEPORTE@AWEMAINTA.COM

Nicole Hoevertsz ta pone bandera di Aruba den bista di henter mundo

Secretaria general di COA y vice presidente di IOC a reuni cu Prome Minister



DIABIERNA mainta 8 di november Prome Minister Evelyn Wever-Croes a reuni cu Secretaria General di Comité Olimpico Arubano señora Nicole Hoevertsz.

Desde aña 2021 Nicole tambe t'e Vice-Presidente di e

organo mas halto di e deporte mundial esta Comité Olimpico Internacional (IOC) y Presidente di e comision di coordinacion p'e Weganan Olimpico di LA2028. Durante e reunion, Nicole a duna Prome Minister un actualisacion pa local ta trata su trabou den Comité Olimpico Internacional, IOC.

Prome Minister y Aruba ta hopi orguyoso di e rol cu Nicole ta desplega, poniendo Aruba riba mapa internacional. Aparte di esey Nicole tambe ta dedica tempo inspirando y formando hobennan den area di deporte, inculcando e importancia di norma, balornan y disciplina den deporte. Recientemente, Nicole a ricibi e Condecoracion Real, como Officier in de Orde van Oranje-Nassau p'e añanan di dedicacion na deporte, na nivel nacional y internacional. Nicole a dedica henter su bida na deporte paso e ta convenci cu esey t'e cos di mas bunita y mas importante pa crea un miho mundo y un miho pais.

"Cu e dedicacion di Nicole y e talento di e atletanan Arubiano, den futuro Aruba por tin su prome medaya Olimpico. A trata di un combersacion ameno y hopi prometedor pa futuro olimpico di Aruba. Aruba ta un isla chikito y Nicole a resalta e nomber di Aruba internacionalmente. Danki Nicole, Aruba ta orguyoso di bo. Danki pa pone nos bandera den bista di henter mundo", Prome Minister a expresa.

